

# Sa mundana cummedia

Bore Poddighe

## *PARTE PRIMA*

1.

De Dante su poeta de Toscana,  
sa Divina Cummedia leggimos;  
e noi sardos prite non faghimos  
un'attera Cummedia mundana?  
pro dare lughe a sa zente isolana  
sos chi s'estru poeticu tenimos,  
pro chi non bastat sa Divina sola  
a sa Sardigna nostra a dare iscola.

2.

Dante, de una mente illustre e digna,  
tra sos poetas hat sa prima sedia;  
in versos hat descrittu una Cummedia;  
contra a sa setta perfida maligna,  
e nois cantadores de Sardigna  
nos istamos a morrer de inedia?  
no, no, frades, bintramos tottu in giostra,  
a fagher puru sa partida nostra.

3.

Est beru chi fit Dante Alighieri,  
de sentimentos fieros, gagliardos,  
e noi semus che fizos bastardos  
contra de issu in tale mestieri.  
Poi, chi balet unu furisteri,  
naran a dicciu, prus de deghe Sardos,  
ma tottu custu ispaventu e paura,  
non faghet a sos donos de natura.

4.

Dante, hat cantadu cun ingegnu ed arte,  
ca fit in poesia meda esattu;  
hat fattu tantu sì, ma no hat fattu  
nudda de prus che i sa sua parte,  
tra sos poetas fit su grande Marte,  
lu bidimos de s'opera in dogn'attu  
e già ch'issu l'hat fatta, naro a bois,  
sa parte sua, toccat como a nois.

5.

No isco bonu s'a cantare hap'essere,  
pro ch'hapo sentimentos pagu espertos,  
e istruidu non seo che certos  
chi più bellos versos ischin tessere.  
Intantu provo, si b'hapo a resessere  
solu cun donos de natura offertos,  
senza istruzione, e senza istoria  
chi aggiuet sa debile memoria.

6.

Su tema ch'hapo in conseguenza,  
de risolvere deo, a dogni frade;  
est, s'andamentu de s'umanidade  
da cand'in terra hat happidu esistenza.  
Origine fundamentu e dipendenza  
de sa ricchessa e de sa povertade,  
pro chi medas ancora no han cumpresu,  
poveru e riccu coment'est dippesu.

7.

Ministros de su religiosu impreu,  
a creere a sos populos han dadu;  
chi chie est in su mundu isfortunadu  
est, chi fortuna non l'hat dadu Deu,  
su chi non creo giustu a parrer meu  
ch'i Deus si siat mai interessadu,  
de dar'a chie su male, a chi' su bene  
comente oe, sos bigottos crene.

8.

Deus che sapiente e bonu mastro,  
send'unu babbu giustu imparziale;  
hat dadu a tottu diritt'uguale  
no hat fatt'unu fizu, unu fizastru,  
no est pro naschere in bonu o mal'astru  
s'istamos chie bene, e chie male,  
tottu dipendet dae sa faccenda  
de non esser comune sa sienda.

9.

Pro dare a s'impostura unu rimproveru,  
presento 'e sa Cummedia su prim'attu;  
solu pro narrer s'est, Deus ch'hat fattu  
in su mundu su riccu e i su poveru.  
Tue Musa ch'in me, faghes riccoveru  
risolve nende cun mettodu esattu,  
Deus hat fatt'ogni bene comunu,  
però, riccu ne poveru a nessuno.

10.

Tottu sa razza umana senza erranzia,  
si dipesa est d'una sola famiglia;  
duncas; no est nessuna meraviglia  
s'aian dogni cosa in comunanzia,,  
no esistiat tando padronanzia  
e ne mancu discordia ne puntiglia,  
comente fin sos benes de cumone  
andàna a tribagliare in unione.

11.

De comente sa zente aumentiat,  
e s'est tottu sa terra populada;  
in dogni bidde cittade o burgada  
su bene comunale tottu fiat.  
Part'e dirittu dognunu teniat  
comente de bessidas e d'intrada,  
fit in comunu patimentu e gosu  
e nessuno non fit necessitosu.

12.

Comunale tenian terra e fruttu,  
bestiamene e cantu s'est connottu  
su viver necessariu aian tottu  
de vegetales e dogni produttu.  
Non fit nessunu padronu assduttu,  
dogni frade a su frade istàt devottu,  
e cun tale sistema beneficu  
non fit nessunu povero ne riccu.

13.

Ma dogni tempus benit pro passare  
regnat s'amore e i s'ingratitude;  
si cambiat sistema e abitudine  
sos tempos fattos sun pro cambiare.  
Cun su tempus s'est bida divertare  
sa fratellanza in ischiavitudine,  
e tottu cuddu bene comunariu  
est poi diventadu propietariu

14.

Cun su tempus naschida est s'avarizia,  
in su mundu s'orgogliu e i su fele;  
su primu fit Cainu contr'Abele,  
prepotenzia usare e ingiustizia;  
poi de nobilesa e de pigrizia  
s'avaru d'esser amigu fidele,  
dae Cainu sa crudelidade  
istesit post'in usu dogn'edade.

15.

S'est bidu poi s'omine non bonu,  
cun trassas, cun astuzias e affrontos;  
intimidire sos omnes tontos  
cun ispaventos e superbu tonu,  
pro dominare issu che padronu  
si los hat resos dociles e prontos,  
a lu servire, gai est chi s'astutu  
leadu hat su cumandu assolute.

16.

A su mandrone fit sistema duru,  
istare in fratellanza e unione;  
previa chi s'aradu, su marrone,  
toccat a manizare a issu puru.  
E pro esser felice in su venturu  
tempus s'est postu in possessione  
de sos terrinos, pro non tribagliare  
ch'est prus arte leggera a cumandare.

17.

Sos oziosos e malinragados,  
o furcajos comentos los giamene;  
de terrinu comunu e bestiamene  
si sun antigamente appropriados.  
Issos tando sun riccos divertados  
a sos tontos lassadu hana su famene,  
e dae tando su mundu formadu  
de poveros e riccos est'istadu.

18.

Tottus cuddos chi s'hana impadronidu,  
antigamente su bene fraternu;  
de su mundu leadu han su governu  
e i sa frattellanza han abolidu.  
Unu de issos re l'hana eleggidu  
pro haer su dominiu in eternu,  
e sutta custos tottu omnes bravos  
sos tontos sun restados ischiavos.

19.

Da' custos bonos e fieros Martes,  
sos populos istesini obligados;  
send'ischiavos e umiliados  
a tribagliare de tottu sas artes,  
e divisos los hana in duas partes  
una bracciantes e una soldados,  
pro defender su regnu e i su tronu  
e suggettare su malu a su bonu.

20.

Pro disciplina contra a sas chimeras,  
de su populu ischiavu reduidu;  
han puru antigamente costruidu  
sos regnantes, presones e galeras.  
Regulamentos e legges severas  
pro sos ribelles hana istituidu;  
e dogni pegus de s'umanu gregge  
han suggettadu cunformas sa legge.

21.

Cuddos chi de prus grand'estensiones  
de terrinos si sunu impossessados;  
cun su tempus, si sunu nomenados  
contes, ducas, marchesis e barones;  
e distintos si sun menzus persones  
de cuddos chi sun poveros restados,  
gai s'astutu bennid'est civile  
e i su tontu rusticcone e vile!

22.

Istituidu han omnes factores,  
pro dirigentes de sos lavorantes,  
Centuriones pro sos militantes  
cun distintivos grados superiores.  
De milites massajos e pastores,  
custos fattesin de rappresentantes,  
eseguinde ordines e doveres  
giust'a sa volontade de sos meres.

23.

Ecco comente tra sa razza umana,  
sos furbos su dominiu han leadu;  
e cun barbaridade han guvernadu  
a cantu sas istorias mi nàna.  
Bendiana sa zente e comporana  
a us'e bestiamene domadu  
e da sos populos tottu sun istados  
timidos, e che deos adorados.

24.

Tando est chi parziales sun bennidos  
delizias mundanas e dolores.

E poveros da' s' epoca e segnores  
in su mundu si sun distinguidos.

Ecco s' origine de duos partidos  
meres de cumandare e servidores,  
e dae tando chie arat e zappat,  
e chie senza sudore pane pappat.

25.

Torramos como a Deu onnipotente,  
comente oe cret calch' unu maccu.  
chi s' est de su terrestre impossesadu,  
siat fattu da' issu veramente.

Non Deus, ma s' astutu a s' innocente  
hat obligad' a fagher su teraccu.

E i s' astutu bennidu est servidu  
cando su tontu s' est sottomitidu.

26.

Deus a nemos dadu hat martirizos,  
e a nessunu sa felicidade;

e no hat fattu parzialidade  
sende nois de issu tottu fizos.

Est ingannu 'e su mundu art' e manizos,  
s' a chie est riccu e chie in povertade,

Deus lassadu hat sa terra comuna  
e pro tottu uguale sa fortuna.

27.

Podimos sas delizias antigas,  
nois cherinde, in su mundu gosare?

bastat però in comunu lassare  
terrinos e produsutos e fatigas.

Usende su sistema 'e sas fromigas,  
vivende in fratellanza tutt' impare,  
e s' hamos in comunu ogni materia  
nessun est riccu e nessunu in miseria.

28.

S' esserat d' esser in d' ogni paisu  
fruttos e territoriu in comunu;

de s' arte sua tribagliare ognunu  
su produttu tra tottu esser divisu.

Faghimis una vida 'e Paradisu  
senz' essere isfruttados dae nessunu;

dimis esser felices e cuntentos  
tottu, de grazias e de alimentos.

29.

S' antigu paradisu Eden terrestre,  
ch' han sos furbos istoricos giamadu,

certu chi cuddu tempus fortunadu  
de sos benes comunes istad' este.

Inue naran su Deus celeste  
ch' Adam' ed Eva aiat colloccadu;  
ma sa giusta e sincera veridade  
est, su prinzipiu 'e s' umanidade.

30.

Su Serpente malignu ingamadore  
ch'hat s'antiga innocenzia tentadu,  
chie creides chi siat istadu  
custu vile demoniu seduttore?  
iss'est s'omine avaru usurpadore  
chi s'est de su terrestre impossesadu,  
e lassad'hat sos tontos pro disgrazia  
ispozados de bene, e d'ogni grazia.

31.

E si da calchi furbu o ignorante  
no est su narrer meu applaudidu,  
mi lu fettat toccare cun su didu  
su chi cret prus demoniu devastante.  
Deo piùs de s'omine birbante  
serpente ne demoniu hapo idu,  
in su mundu capace a fagher male,  
e custu est su demoniu infernale.

32.

Naran pro serpentina tentazione,  
Adam' ed Eva esser ruttu in peccadu;  
e su peccadu chi siat istadu  
de matrimoniu sa congiunzione  
e ch' in su mundu pro tale cagione,  
s'est su bene e su male originadu,  
degai hat dadu a creere s'impostura  
pro occultare ch'istada est s'usura.

33.

Si sa congiunzione vietada,  
fit de su matrimoniu comente  
sa terra d'animales e de zente  
podiat mai benner populada?  
o infame impostura! retirada  
faghe dae su coro e da sa mente,  
ca sena matrimoniu ista certa  
de viventes sa terra fit deserta.

34.

Si fit su matrimoniu unu reattu,  
Deus "creschide e multiplicade"  
nadu no iat a s'umanidade  
ne omine ne femina iat fattu:  
ma ca fit necessariu tal'attu  
est ch'issu hat permitidu s'unidade  
pro ch'esserat su mundu populadu  
e s'est utile, certu no est peccadu.

35.

Veramente sa frutta proibida,  
chi Deus de toccare non cheriat,  
atera cosa esser non podiat  
si no sa terra arbur'e sa vida.  
Sende comune senza dividida  
custa, pro tottus grazias daiat,  
non lassende sa terra comunale  
nde naschiat su bene e i su male.

36.

Fit su bene comunu eternu e sumu  
su proibidu simbolicu fruttu  
ma si calch'unu padronu assoluttu  
s'esseret post'in su terrestre pumu  
andàna sas delizias in fumu  
e in peccadu s'omine fit ruttu;  
ca da su paradisu fora essiat  
cuddu chi possidenza non teniat.

37.

Fit dada 'e Deus sa permissione,  
de sa terra ogni fruttu 'e mandigare;  
e i s'umanidade de istare  
totu in fratellanza e unione.  
Ma fatt'haiat proibizione  
de sos terrinos a s'impossessare,  
ca bene ischiat chi cun su possessu  
beniat s'avarizia e s'interessu.

38.

Culpa de s'usurariu demoniu,  
su poveru est de grazias ispozadu;  
non pro ch'hapat cumittidu peccadu,  
unidu a sa cumpagna in matrimoniu,  
ma pro l'haer dirittu e patrimoni  
su malaittu serpente usurpadu,  
ed est restadu senzand'haer culpa  
che ossu rosigadu senza pulpa.

39.

Ma furbamente s'omine impostore  
a su tontu sa frase hat coloridu.  
e narat, chi su fruttu proibidu,  
est s'attu congiuntivu de s'amore:  
e i su mundu esser ruttu in errore .  
ch'Adamu a Deus hat disubididu;  
e Deus pro dispettu de improvisu,  
l'hat iscacciadu da su paradisu.

40.

Ma si tale impostura esserat vera,  
da' su giardinu terrestre iscacciados  
tottu sos prinzipales fin istados  
pro sa libidinosa violera.  
De Adamu in sa propria manera  
dian esser de grazias ispozados,  
invece custos, giardinis e'fruttos  
possedin e in peccadu ... no sunt ruttos.

41.

S'impostura ad intender puru hat dadu  
chi pro tale peccadu tantu forte,  
est intrada in dominiu sa morte  
e a morrer sa zente hat cominzadu;  
da cando Adamu est ruttu in peccadu,  
mentres chi prima tenian sa sorte  
d'esser tottu che Deos immortales  
tant'omines coment'e animales.

42.

Dèo non naro chi faula siat  
cantu nat s'impostora propaganda,  
però fagher cheria una dimanda  
chi si mai nessuno no moriat,.  
comente in terra sa zente cappiat?  
devia benner certu a dogni banda  
tottu su mundu interu, senza iscampu,  
prenu de zente che s'erba in su campu.

43.

Deus Adamu chi deviat morrer  
su die chi su fruttu eret toccadu,  
nos narat s'iscrittura, chi l'hat nadu;  
ma sa morte ch'hat devidu proponer  
lu podimos cumprender e supporter  
moriat d'essere in felice istadu,  
e mandigaiat su pane cun pena  
andende a tribagliare a terra anzena.

44.

Da cuss'epoca senza proprietade  
in su mundu est sa poverazenia,  
e fina a cando naschet su Messia,  
ch'est, s'unione tra s'umanidade,  
non det gosare prus felicidade  
giustu comente nât sa profezia,  
naschidu su Messia de protesta  
a su serpente ischiacciat sa testa.

45.

Narat chi Deus unu Cherubinu  
ponzesit in giardinu cun s'ispada,  
pro ch'esserat sa frutta rispettada  
da cuddu poveru Adamu mischinu!  
de modu chi in su terrestre giardino  
non tenzerat prus drittu de intrada;  
e si'a prepotenzia b'intraiat  
s'Anghelu cun s'ispada lu purghiat.

46.

Gasi in su mundu sos Deos novellos  
comente da' s'antigu l'han connottu,  
una legione formadu s'an tottu  
d'anghelos cherubinos barracellos;  
e terrinos, palazzose castellos  
custodiat s'agelicu cumplottu,  
si calch'Adamu, chi ladru si narat  
andat e fura. s'anghelu l'isparat!

47.

Naran chi Deus, culpa 'e sos peccados,  
mandesit in sa terra temporales:  
e de su mundu tottu sos mortales  
restesin in sas abbas annegados,  
e ch'intro s'arca si sunu salvados  
solu Noè, cun fizo e animales:  
e fattu hat des sos malos istermini  
a sos bonos pro dare su dominiu.



48.

Ma it'est in veridica materia,  
de Noè, sa grand'arca salvatrice?  
fit su vile sistema usurpatrice  
chi cun sa sua infame cattiveria,  
mandadu hat su deluviu de miseria  
supra sa zente povera infelice,  
e salvados si sun certu sos bonos ...  
chi de su mundu benzesin padronos.

49.

Ecco comente in su mundu est bennidu  
s'origine de su bene e de su male:  
sa disfatta 'e su bene comunale  
istesit su peccadu cumittidu.  
E su s'haer sa terra impadronidu  
intesit su diluviu universale,  
e su nou sistema, su monarca  
certu de salvamentu istesit s'arca.

50.

Sos ch'intro s'Arca hana fattu dimora  
si sun da' sas miserias salvados,  
e contàna chi mortos sun istados  
sos chi de s'arca restados sun fora;  
ca senza possidenza sun ancóra  
poveros tottus e disisperados,  
e morin in mesu s'inundazione  
de povertade e disperazione.

51.

Pustis ch'est su deluviu cessadu  
de sa facenda usurpante demonia,  
leggimos chi sa turre 'e Babilonia  
han sos omnes furbos fraigadu,  
pro paura ch'appende aquistadu  
già sa mundana suprema Egemònia,  
da su podere no pottan crollare  
beninde su diluviu a torrare.

52.

A cantu nàt s'istoria sagrada,  
e diversas ancora opinionones,  
nach'istesit de pedras e mattones  
sa turre de Babele fraigada.  
Pro me naro chi fit edificada  
de Barones, de principes, de Contes  
de Ducas, Cavalieris e marchesis  
in tottu sas cittades e paesis.

53.

Sa turre de Babele senza farta,  
devet bene comprender dogni umanu,  
chi no est unu fabricu de manu  
de comente sa oghe s'est isparta,  
ma cudda turre politica e arta  
de antigu dominiu sovrano,  
custruida cun arte, e cun ingegnu  
sa ch'est óe, esistente in dogni regnu.

54.

Ecco comente in su globo terrestre,  
giamadu paradisu deliziosu,  
su serpente malignu insidiosu  
de dogni bene impadronidu s'este.  
E de su proletariu pro peste  
hat puru su dominiu poderosu  
e cheret ubbididu si cumandat,  
e guai de cuddu chi no andat!!

55.

Unu governu devet dominare  
pro non succeder ne briga ne gherra,  
ma fattigas e fruttos de sa terra  
devian esser in comun'e pare:  
no una parte sola profittare  
e s'ater' haer de pane una perra,  
si su bene comune s'est connòttu  
devimis tribagliare e goder tottu.

56.

S'est de tottu su Sole e i sa Luna  
e s'aria de tottu a respirare,  
si de nascher'e morrer ugualare  
cherfidu hat sa natura, sa fortuna,  
prite sa terra sienda comuna  
de nois tottu non podet istare?  
Subra custu su drittu de giustizia  
mancat, proite? Culpa 'e s'avarizia.

57.

Intes'hazis comente hat caminadu  
s'umanidade de su mundu intreu?  
cumpres'hazis chi culpano nd'hat Deu  
si chie est riccu e chie isfortunadu?  
ben'hapo custos versos dedicadu  
pro chi cumprendats'omine babbeu,  
si chie est riccu e chie mendicante  
est causa de s'omine birbante.

1.

S'istoria legginde a pramu a pramu,  
dae Adamu finas a Noè  
no esistiat moneda ne Rè,  
send'in vida su patriarca Abramù:  
de sa moneda esistidu est su ramu  
lu narat in sa Genesi Mòsè,  
ma post'in cursu e perfezionada  
da su re Cinesu Fu, est istada.

2.

De s'avarizia s'origin' infame  
sa moneda nat ch'est sa zente dotta:  
sa prima istesit fatta 'e terra cotta  
sa segunda de pedde o de corame  
poi de ferru, de prumu e de rame  
cun su tempus andende s'èst connotta  
e in fine de carta oro e prata  
e de nicchel 'e brunzu istesit fatta.

3.

In possessu de sos avaros mannos  
sa moneda est da epoca lontana,  
prima d'esister s'Era Cristiana  
dua mizza e già settighentos annos.  
Non fin tantu in su mundu sos ingannos  
Cando moneda no nde manizzàna.  
Da cand'istada est sa monedain usu  
creschidu est s'ingannu prus e prusu.

4.

Cando moneda non s'agataiat  
in cale modu si cummerziada?  
Beniat pari pari iscambiada  
sa merce chi dognunu produiat.  
A su poveru chi trabagliaiat  
comente tando su riccu pagada?  
No mancat no, de lu retribuìre  
in cosas de pappare e de bestire.

5.

In cussu tempus antigu e inopiu  
senza moneda viviant l'ischimos:  
oe chi sa moneda nois tenimos  
forzis proffittu nd'hamos a su dopiu?  
Paret a mie ch'istamos su propiu  
e dae s'usu antigu no transimos;  
ca sa moneda andamos a gastare  
in bistimentu e in cosa 'e pappare.

6.

Prima d'esser in usu su dinari  
su poveru fit menzus favoridu,  
ca su mundu non fit tantu accanidu  
tando comente oe, in dogn'affari:  
mancari s'interessu pari pari  
e i s'ingannu esserat esistidu:  
non fit certu sa zente in dogni cosa  
tantu comente oe, interessosa.

7.

Bene comprenden sas dottas persones  
cando moneda no si nd'agattada  
in su mundu nessunu no pensada  
a ponner in sa Banca miliones!  
Ma pensaian d'haer provigiones  
solu da una a s'atera annada:  
senza su monetariu isquillu  
fit prus su mundu in paghe, tranquillu.

8.

Mentres cun su sistema monetariu  
creschida est s'avarizia senzacontu,  
ca finzamentas s'omine pius tontu  
est diventadu in su mundu usurai,  
siat bracciante siat proprietariu  
pro regollet moneda est sempre pruntu!  
Cun asuria e cun avidu coro  
massimamente de prat'e de oro.

9.

B'hat prus de unu riccu possidente  
amante de moneda e abbramidu,  
ch'istat isporcu e male bestidu  
e si castigat finzas de sa brente;  
de lavorantes puru similmente  
medas economistos nd'hamos bidu,  
de totu custos males senza pausa  
sa moneda est s'origine sa causa.

10.

Cun sa moneda dogni birbantesimu  
in su mundu fatt'hat grande progressu,  
s'istrozinismu, su vile interessu,  
s'ipocrisia, su gesuitesimu.  
Medas si benden pro un cintesimu  
s'anima, sa cussenzia, e oppressu  
est pro sa monetaria materia  
su lavorante d'estrema miseria.

11.

Si sun bidos algunos principales  
chi dinaris possedin a isportas,  
fagher derettas sas causas tortas  
in cortes de assisi, in tribunales:  
cun falzos testimonzos illegales  
personas reas benzesin assortas,  
e cundennados tantos innocentes  
chi de dinaris non fin possidentes,

12.

B'hat prus de unu fizu disonestu  
de calch'omine riccu benistente,  
d'haer dinaris a manu bramante  
pregat finzas su babbu amorrer prestu!  
Senza de cust' est craru e manifestu  
comente nd' hamos bidu d'ogn'istante,  
a sos dinaris pro haer amore  
medas feminas mancan a s'onore.

13.

Naran chi sa moneda est preziosa  
pro eleganza e pro comodidade  
deo puru l'amito, in veridade  
ma però de tott'ateru est dannosa.  
Ca de malu nd'hat naschidu ogni cosa  
superbia, egoismu e crudeltade;  
omicidios, furtus, tradimentos,  
cambiales e falsos testamentos.

14.

A bite servit s'oro e i s'argentu?  
Narat s'omine dottu e sapiente;  
servit pro fagher avara sa zente,  
ma pro bestire ne pro nutrimentu.  
Tottus l'ischimos pro isperimentu  
sa moneda non servit a niente,  
mentres chi, s'arga, disprezzada cosa  
est meda prus de s'oro valorosa.

15.

Balet prus s'arga de su muntunarzu  
de s'oro, de s'argentu e de su ramene.  
Paragonare s'oro a su ledamene  
m'hazis a narrer chi so faularzu?  
Nademi trigu, simula echivarzu  
legumenes, erbaggios e fruttamene,  
de s'oro, de s'argentu e de su ramene  
o sun de su ledamene sos fruttos?

16.

Si fimis tottus in su mundu riccones  
e nessunu pensàt de tribagliare,  
dimis tottu de famene crepare  
prata e oro teninde a muntones!  
Ca senza su tribagliu 'e sas persones  
no nos podet sa terra alimentare;  
e si a tribagliare no andimis  
riccos d'oro, de famene morimis!...

17.

Lassamos como s'oro e i s'argentu,  
sos miliardos cun sos miliones,  
e faeddemus de sas religiones  
si partin da Divinu fundamentu  
o si est tottu mundanu un'inventu  
de birbantes, e furbos e mandrones;  
s'est de Divinu o mundanu istituttu  
connoscher la devimos dae su fruttu.

18.

Da' su fruttu connota est sa pianta  
si est de bona o mala calidade,  
si dat fruttos d'amore e caridade.  
Si podet narrer chi est bona e santa.  
Ma si santa de lumene la nanta  
e donat fruttos de barbaridade,  
iscusa o mundu, cumpatti e perdona,  
non poded esser ne santa, ne bona!

19.

Sa religione, amore e fratellanza  
deve pro esser santa istabilire.  
pro esser giusta devet abolire  
sa servitudin'e sa padronanza,  
e devet imitare s'uguaglianza  
gosare tottus e tottus pattire!  
E si no est de tale condizione  
Santa e giusta no est sa Religione.

20.

Deo naro: s'esserat decrettada  
sa religione tra s'umana zente  
de unu Deus veru onnipotente,  
una sola in su mundu fit istada.  
Invece d'una ottighentas che nd'hada  
e tottus tenen Deus diferente  
mentr'una sola e unu solu Deu  
deviat esser in su mundu intreu.

21.

Bidinde finzas sos prus ignorantes  
prestare cultu a tantas Deidades,  
cumprenden chi sun tottu falsidades  
e de mancuna diventana amantes;  
aman de viver liberos pensantes  
e da' sas religiosas societades  
connoschinde s'ingannu ei s'imbrogliu.  
Fuin attesu che barc'a s'iscogliu.

22.

Pro chi siat dognunu a conoschenzia  
presento in s'argumentu seguente  
in cale modu tra s'umana zente  
est bennida de Deus s'esistenza;  
de su creadu sa magnificenzia  
s'idea ha fattu naschere in sa mente,  
a s'omine terrenu abitadore  
de un Ente supremu creadore.

23.

Istellas, Sole, Luna, terra e mare,  
lampos e tronos tempestas e bentos  
sun istados sos primos fundamentos  
ch'han devidu sa fide fabbricare  
d'unu Deus ch'hat devidu creare  
astros de chelu e de terra alimentos;  
dognunu in coro sou hat ideadu  
unu Deus mirende su creadu.

24.

Deu s'jerru sa rigida frittura,  
sos immensos calores des'istade,  
sos fruttos de s'attunzu in cantidade  
e de sa primavera sa bellura;  
omines fattos a dogn'istatura  
animales de dogni calidade,  
su naschere, su morrer in comunu  
naran de Deus operas chi sunu.

25.

Duas simplices cosas sunu istadas  
origine de Deus e fundamentu;  
sa meraviglia unida a s'ispaventu  
chi causadu han sas cosas creadas:  
sos terremotos sas malas annadas  
maladias de tristu avvenimentu,  
e in Deus terrore o meraviglia  
han fattu creere s'umana famiglia.

26.

Naran antigamente cunferidu  
ch'hat Deus cun Adamu e cun Noè  
Abramu, Isaccu, Giacobbe e Mosè.  
Naran chi faeddadu l'hana e bidu;  
ma si fit beru, d'essere apparidu  
a tottu custos su Divinu re,  
lasso decider a sos sensos bostros  
fit apparidu puru a tempos nostros.

27.

O tando a sos terrenos abitantes  
cumpariat ca fin prus innocentes?  
No. Ca leggimos a ojos videntes  
chi tando che i como fin birbantes  
fin de occhire e de furare amantes  
forsis più de sos tempos presentes!  
Si tando a sos birbantes cumpariat  
Deus, puru oe cumparrer deviat.

28.

Si s'est lassadu su Deus celeste  
bidere antigamente e faeddare,  
a tempos nostros a nos visitare  
poite mai cumpartu no este?  
D'esser tando masedu como areste  
Deus, custu non podet mai istare.  
Sende su mundu e Deus su mattessi  
diat cumparrer a a sos pabas nessi.

29.

In ses dies su Deus infnitu  
narat Mosè chi su mund'hat creadu  
senza nudda haerbidu ne toccadu  
de cant'issu in sa Genesi hat iscrittu:  
cando Mosè fit naschidu in s'Egittu  
aiat trinta seculos passadu  
d'Adam' ed' Eva sa creazione  
e no est che imaginazione...

30.

Cheria de mi narrer in cust'attu  
su pius de scienza profundu,  
si Deus est su ch'hat fattu su mundu  
o si su mundu est ch'a Deus hat fattu?  
Pro parte mia ch'est su mundu ingrattu  
naro ch'hat fatt'a Deus francu e tundu.  
E i su mundu bos naro in comunu  
chie l'hat fattu non l'ischit nessunu.

31.

Da' tempus antighissimu remottu  
curret de Deu in su mundu sa fama,  
e tottu de connoscher sunu in brama  
su fattore 'e su mundu sende ignottu,  
narrer sempre chi Deu hat fattu tottu  
amos intesu de babbu e de mama,  
ca gai da sos furbos sunu istados  
issos puru che nois imparados.

32.

No nd'est seguru nessunu vivente  
chi Deus hapat su mundu creadu  
pro chi su mastro chi l'hat fabbricadu  
nessun'a bidu in s'epoca presente;  
nessunu certu est chi personalmente  
a ue est Deu est andad'e torradu?  
No sende certos, namos de gasie  
su mund'est fattu, e non l'ischit da chie.

33.

Da' unu punzu 'e prudere impastadu  
fragile e insensibile sustanza,  
a imagine sua o somiglianza  
Deus naran chi s'omine hat creadu:  
però de cale razza siat istadu  
chi l'hat fattu, non nd' hamos seguranza.  
Mundu risolve narami e faedda  
si fit de razza bianca o niedda?

34.

Si nd'hat fatt'unu de razza bianca,  
su ruju, giallu, nieddu, olivastu,  
fattu no est da su propriu mastro  
oppuru fattu l'hat a manu manca.  
Non podet mai essire dae farranca  
de unu grande artista un'impriastu.  
Sende fattos da' Deu, est craru e nottu  
fimis de una razza istados tottu!...

35.

Si costruidu esserat s'universu  
da unu Deus giustu e sapiente,  
bos naro in veridade, mundu e zente  
deviat tenner sistema diversu:  
non fit istadu coment'est perversu  
in su tempus passadu in su presente:  
ma dian esser tottu sos terrestes  
uguale a sos Anghelos celestes,

36.

Si unu Deus d'amore e giustizia  
fit istadu de s'omine fattore,  
in nessunu terrenu abitadore,  
non deviat regnare s'avarizia;  
ne una parte de zente in delizia  
deviat esser ne una in dolore,  
ma tottus uguals e che frades  
devimis essere o mi lu negades?



37.

Si fimis fattos de Deu e fizos  
non fimis in discordia ne in gherra.  
fit istadu su mundu a dogni perra  
unu giardinu de rosas e lizos;  
regnat delizias, dolores, fastizos,  
ca semus tottu fizos de sa terra,  
e coment'est su clima diferente  
in ogni parte, de gai est sa zente.

38.

Sos primos abitanti supponiana  
in su Sole sa forza soberana,  
comente e veru Deus l'adorana  
e grazias da issu imploraiana,  
ateru Deus no nde connoschiana  
e finas oe in sa terra Africana,  
tottu de Cam sa discendente prole,  
basat sa terra e adorat su Sole.

39.

Cust'est prova chi tando no esistiat  
su nostru babbu eternu nominadu,  
proite si s'esseret agattadu  
su mundu a issu ricconnotu aiat.  
Bidinde s'omine chi adoraia  
Su Sole, it'Issu diat haer nadu?  
Certu deviat narrer mundu ingrattu,  
non conosches su Deus chi t'hat fattu?!

40.

Ca send'issu su grande architettore,  
chi cun operas bellas s'est d'istintu,  
diat haer sos populos costrintu  
a connoscher s'insoro creadore;  
cun castigos oppuru cun amore  
sos africanos haiat cunvintu  
de venerare a issu ch'est su mastru  
de tottu, e non su Sole ch'est un astru,

41.

Bidinde sos de s'Asia adorare  
sos Deos: Zoroastru, Budda e Brama,  
provat de custu Deus s'alta fama  
chi mai nd'hana intesu mentovare!  
Ma s'issu primu hat depidu creare  
su mundu, puru 'e sa fide su drama  
deviat haer tra custos diffusu  
d'ateros Deos pro non fagherusu.

42.

A Cerere, a Diana e a Ciprigna,  
daiat cultu sa Religios'arte,  
e adoradu fit su Deus Marte  
in sa 'idda de Martis, in Sardigna;  
ca de su babbu eternu s'alta insigna  
non fit tando connotta in custa parte,  
e non teniat de Deus su gradu  
finacando sos furbos bi l'han dadu!...

43.

In s'Antiga cittade sulcitana  
ue Sant'Antiogu, est oe in die,  
bigottu aberi s'uju naru a tie!  
Deos diversos ancora adoràna;  
sa suprema potentia soberana.  
De su babbu eternu mancu inie  
no fit; ca narat una antiga lapide  
chi adorana Iside e Serapide.

44.

Sos Ebreos, cun fide e veru coro,  
lu narat s'iscrittura e nde so certu,  
adoran de Sinai in su desertu  
pro Deus veru unu vittellu d'oro.  
Signu e prova chi non fit s'insoro  
su Deus chi Mosé lis hat offertu;  
ca si l'haian da' tempus prolissu  
connotu, adoradu ian a issu.

45.

S'esserat custu Deus esistidu  
prima de nos mundanos eredeos,  
no aiat su mundu ateros deos  
prima de isso adoradu e servidu:  
e nemanh'issu aiat permittidu  
ad' asianos ed europeos,  
de venerare dae polu a polu  
ateros deos che a issu solu.

46.

Sun trintamiza a lu narrer in Sardu  
Deos antigamente chi adorana  
prima 'e su babbu eternu, e oe hana  
credentes prus de unu miliardu,  
su babb' eternu naschid'est prus tardu  
e cun sa forza sua soberana,  
tenet solu tra tottu sos viventes  
treighi miliones de credentes...

47.

Si de tottu sos deos sa possanza  
su babb'Eternu haeret superadu,  
sol'issu de credentes fit istadu  
de dogn'ateru Deu in maggioranza;  
ma send'issu su prus in minoranza  
de dogn'ateru Deus veneradu:  
est prova certa chi no hat podere  
e ne de chelu e terra est issu mere!

48.

Resultat d'esser cust'eternu Rè  
a dogn'ateru Deu inferiore,  
pro chi s'istadu fit superiore  
si fit distintu pro natura in sè;  
solu l'hat nadu e iscrittu Mosè  
ch'est'issu onnipotente e creadore:  
ma pro lu creare non bastat, de seguru,  
su lu narrer; bi cheret provas puru!

49.

Est tottu imbrogliu o mundu ischire tese  
de sos Deos e Deas s'impiantu,  
mortu Mosè, s'apostoladu intantu  
su babb' eternu divisu hat in trese;  
e tue prima in d'unu como crese  
in babbu, fizu e ispiridu santu!  
cheret narrer chi deos milli e unu  
a gustu sou, nde faghet dognunu.

50.

Sette seculos pustis sepultadu  
Cristos, fizu de Deu e de Maria,  
pro deu onnipotente in s'Arabia,  
A Maometto s'ana incoronadu;  
su nostru babbu eternu nomenadu  
ne i su fizu sou, su Messia.  
No est dae sos arabos connotu  
ch'a Maumetto dognunu est devotu.

51.

Tempus prima, sa cresia Romana,  
d'esister Maumetto fit fundada;  
su deus Giov'e Marte issa adorada  
fina a cando s'est fatta cristiana;  
provat chi sa potentia soberana  
de su babbu eternu, penetrada  
in cussu tempus in issa non fiat,  
si a Giov'e Marte adoraiat..

52.

Giove e Marte su mundu a tottu proa  
dominàt prima de su babbu eternu;  
si trattat ch'issu est bintradu in governu  
battor' mizza annos de custos a coa;  
da s'era cristiana epoca noa  
Roma connotu hat su Deus modernu;  
e dadu a tando gorias a vantu  
a babbu e fizu e ispiridu santu.

53.

Però happende sos contos tiradu  
cun babbos, fijos, ispiritos santos,  
chi non teniat introitos tantos  
Roma, che prima in su tempus passadu;  
e it'hat fattu? Hat santificadu  
baranta mizza tra santas e santos  
e costruidu hat cresias e colonnas  
a treghentassessantotto Madonnas...

54.

Forsis Roma l'hat fattu pro ingamu  
d'haer tantas madonnas tituladas?  
No! L'hat fattu pro esser festeggiadas  
tottu sas dies chi benin in s'annu.  
Santos bi nd'hat unu numeru mannu  
ch'in s'annu no han dies signaladas,  
custos in biddas, cittades e portos  
sun festegiados paris cun sos mortos!..

55.

Diffattis chi su die maccarrones  
si pappat pro costumene connotu:  
chie los pappat cun casu e regotu  
chic cun bagna 'e puddas e cabones.  
santos e festas e processiones  
bind'hat bundantes pro dogni bigotu,  
chi tantu a bustu comente a chena  
bistare poded'a bentre piena.

56.

Sa religione est una miniera  
pro pabas, munsegnores e viccarios;  
sos santos sunu tottus impresarios  
chie in un'arte chie in d'una carriera;  
o populu ignorante, cunsidera  
ite fruttu ti dan sos santuarios?  
Non bides santos, madonnas e Cristos,  
ch'est unu isfruttamentu a sos artistas?!

57.

Osservas pro dogn'arte o mestieri  
ch'hana postu unu santu protettore;  
pro sos massajos est santu Sidore,  
santu Vissente, 'e su mastru ferreri,  
santu Crispinu pro su sabatteri,  
santa Barbara pro su minadore,  
santu Giuseppe cantende a s'anninna...  
est protettore 'e sos mastros de linna.

58.

Santu Cosimu e santu Damianu  
pro su dottore e pro su famacista;  
de sos chi sun guastos a sa vista  
santa Lughia s'impresa hat in manu;  
su pastore in ierru e in beranu  
protegget santu Giuanne Battista;  
a sant'Antoni, festadu in benharzu  
l'hat fattu protettore 'e su porcarzu.

59.

Santu Pedru impresariu de sas craes,  
protegget sos craeris de sa Banca;  
santu Micheli giughet in farranca  
su pesu, e pesat sas animas graes,  
santu Roccu tumores e piaes  
curat de sos chi meda bettan s'anca,  
Maria Madalena protetrice  
est de dogni mundana peccatrice!...

60.

Tenimus puru a santu Costantinu  
ch'est protettore de sos gherrieris  
viaggiadores tottu e passizeris  
han sa Madonna de Bonu Caminu;  
sant'Andria protegget de contnu  
sos piscadores cun sos marineris;  
Maria de su Nie prus benigna  
protegget sos chi benden carapigna.

61.

Infine: pro dogn'arte o maladia  
unu santu reparat sa tempesta,  
pro curare ogni male e dogni pesta  
postu han de su remediù a Maria,  
tiat bastare custa sola ebbia  
però non bastat una sola festa:  
ca senza tantas festas bene ischides  
no poden benner riccos sos preides!

62.

E tiat esser unu grave dannu  
senza festas non benner quattrinos,  
su corpus de sos poveros mischinos  
isfruttan sos padrones tottu s'annu,  
s'anima, sos preides cun ingannu,  
isfruttan de sos poveros...crettinios  
e nd'hana da sa zente pusillanima:  
su fruttu de su corpus e de s'anima!...

63.

Pro cunfortare dogni peccadore  
puru a credere sos populos han dadu,  
chi dogni santu in chelu est avvocadu  
de sos devotos suos difensore.  
Chi l'est in vida in morte protettore;  
e si benit da' Deus cundennadu  
a su fogu eternu pro brujare,  
curret lestru su santu a lu salvare!

64.

Si trattat chi su regnu celestiale  
est uguale a su mundu profanu;  
chie tenet su gradu 'e capitano  
chie de cumandante generale,  
s'odiernu sistema padronale  
in chelu che in terra l'hana a manu  
e chie santu non tenet in corte  
est in s'inferru in vida e in morte.

65.

Si pustis mortu sa vida beata  
tue cheres in chelu acquistare,  
caru devotu, bisonzat pagare  
anticipadu in oro o in prata,  
beta s'offerta tua a sa safata  
chi est'a pes de su santu in s'Altare,  
si cheres esser in chelu Signore  
si no! T'ingullet s'Inferru ah!, It'errore!!

66.

Criticat sa eclesia romana  
sos Ebreos ca tottu cun decoro,  
han adoradu un vitellu d'oro  
comente e deidade soberana;  
e issa, chi si vantat cristiana,  
aradu e boes de Sant'Isidoro  
adorat, cun su naschidu Messia  
ancoras una mula in cumpagnia!!..

67.

Mira cun Santu Giorgi figuradu  
in s'Altare unu caddu poderosu  
e dae su credente religiosu  
benit su caddu e su santu adoradu,  
ed est puru su porcu veneradu  
cun Sant'Antoni bellu gloriosu:  
e giamat idolatra contra Deus  
s'Ebreu, sende issa malepeus!

68.

Assumancu s'Ebreu solu a unu  
animale fatt'hat festeggiamentu,  
sa cresia romana piùs de chentu  
nd'adorat, e de tantas razzas sunu!  
Cust'est a dare a Deus importunu  
pro chi cun vera fide e sentimentu  
adoran sos fideles tottugantos  
Deos impare a Bestias e Santos!!...

69.

Unidamente a madonninas bellas  
adorat su cattolicu credente  
su Coccodrillu, su vile Serpente,  
su Sole, e i sa luna e sas istellas. .  
E cun santu Micheli in sas capellas  
adorat su Demoniù prepoterte,  
chi su mattessi santu hat suttapese  
oh! bigotismu, a ite puntu sese!...

70.

Davide, in d'unu salmu ispiegare (il 115)  
solit a tottu cun sentidos sanos,  
sos deos giughen bucca, ojos e manos,  
giughen pese e no poden camminare,  
camminare, toccare, faeddare  
no poden ca sun tottu idulos vanos,  
e sos ch'in issos confidana fessos  
sun istattuas similes a issos...

71.

Sende s'omine in terra superiore  
subra dogn'animale, ogni materia,  
una scultura adorende a sa seria  
benit a sa materia inferiore,  
torrat dae padronu servidore  
ruet in s'idolatra cattiveria,  
ca pregat e s'invocat e s'inchinat  
a sa materia chi s'arte cumbinat.

72.

Bastat: serremus custu repertoriu  
de trapulas e santos de s'altare:  
trattemus su pattire, su gosare  
de chelu, de inferru e purgatoriu,  
limosinas e missas de offertoriu  
chi sos furbos han devidu inventare;  
su riscattu de s'anima rivale  
da' sa purgante pena temporale!

73.

Ammitinde chi Deus a trint'annos  
cundennerat un anima a sas penas,  
sos preides, cun missas e novenas,  
la salveran da penas e affannos;  
risultat, chi più poderes mannos  
de Deus hant sas personas terrenas;  
già chi de annullare sa sentenza  
fatta da Deus s'omine hat potenzia!

74.

Sa bella est chi si faghene pagare  
dae sos credulones ignorantes  
pro salvare sas animas penantes  
chi sunu in purgatoriu a brujare;  
e, non paghende, las lassana istare  
brujare in sos vulcanos fiamantes...  
imbecilles!...si ruet ue passo  
un'omine in su fogu, eo lu lasso?!...

75.

Dae su fogu pro giustu decoro  
deo lu salvo su simile meu;  
ma sos giamados ministros de Deu  
de lu lassare brujende han su coro!  
Ca crene solu in Deus de s'oro  
isfruttadores de su mundu intreu:  
chi supra a Deus, anima e peccadu  
han su santu negoziu fundadu.

76.

S'eterna vida felice e amena,  
su paradisu pius magnificcu,  
tue l'agatas in domo 'e su riccu  
pro chi de dogni grazia est piena:  
gosat dogni delizia terrena  
a giovanu, a betzu e a pitticcu.  
Si tue chircas anima beatas  
prus de domo 'e su riccu, ue nd'agatas?

77.

Ei s'inferru ardente a meraviglia  
de penas e dolores, su più tristu,  
est in sa domo 'e su poveru artistu,  
massimu d'unu babbu defamiglia,  
senza trigu dinari ne mobiglia,  
de dogni bene e grazia isprovistu.  
Nudu est issu e nudos hat sos fizos  
cust'est s'inferru 'e veros martirizos!

78.

Tottu cuddos ch'in terra hana patire  
durante vida dolore e piantu,  
naran: Deus in chelu ateretantu  
benes eternos det retrrbuire;  
ma custa vida d'eternu godere  
l'agatat in sa fossa in campusantu!  
Morit accabat sa vida penosa,  
godit su paradisu intro sa losa.

79.

S'omine riccu ch'in su mundu passat  
sa vida sua felice e cuntentu;  
su morrer, certu, l'est pena e turmentu  
ca dogni bene in custu mundu lassat;  
più no si disvagas ne s'ispassat  
in ballos, giogos de divertimentu;  
inserradu in sa tumba dolorante,  
ecco s'inferru de su benistante.

80.

Si creteran sos nobiles e dottos  
de s'inferru in sas penas e turmentos,  
e dae sos vulcanos elementos  
d'essere poi mortos bene cottos  
avaros non dian esser ma devotos  
durante vida; e sos possedimentos  
in limusinas tian consumare  
pro no andare a s'inferru a brujare!!

81.

Invece coros duros e redossos  
sun send'in vida; e han s'anima rude  
e non pensan a s'ultima salute  
che bonos religiosos ortodossos;  
aman de isfruttare pulpa e ossos  
a su poveru sende in gioventude:  
e a bezzu lu mandan, pro condanna,  
a mendicare dae gianna in gianna!...

82.

Ecco sos fruttos de sa santidade  
de sos ch'in Deu e in s'anima crene!  
Preigan in su mundu a fagher bene  
e issos trattan cun barbaridade!  
Amore sende in vida, e caridade.  
no nd'hana mai usadu e ne nde tene,  
e bidimos da su proceder feu  
ch'in s'anima no crene ne in Deu!

83.

Chelu e inferru est tott'in custu Mundu,  
bene da' sè lu cumprendet dognunu,  
e poi mortu no l'ischit nessunu  
sos ch'ana fattu istudiu profundu,  
si b'hat istadu infelice o giocundu  
ca omnes terrenos tottu sunu  
sos chi Chelu, e Inferru han preigadu:  
e nessunu a lu ider est andadu!



1.

Tottu sos ch'azis bona intelligenza,  
si de Cristos sa vida esaminades,  
e cun s'artista la paragonades  
in cosa alcuna non b'hat differenza;  
subra dogni mundana sofferenzia  
tale che Cristos s'artist' incontrades,  
e si cantu naro eo non creides,  
leggide s'Evangelu e l'idides!

2.

Figuradu hat sa seta ingannatrice  
su Messias de sa celeste corte,  
in sa vida, in sa naschida, in sa morte  
limosinante, poveru, infelice,  
a tales chi sa classe produtrice  
mai speret de cambiare sorte  
e vivat sottoposta a dogni male.  
Paziente, e che Cristos uguale.

3.

S'in d'una domo da' su fumu gialla  
naschet su poverittu, no est bassesa.  
E ne mancu birgonza ne vilesa,  
ca Cristos est naschidu in una stalla,  
cun tale frase, sa preideralla  
cunfortat s'affligida poveresa  
nende: su nascher no est disonore  
in gruttas, o barraccas de pastore.

4.

Si no hat matterassu né lenzolu  
cando naschet s'infante isfortunadu,  
passenzia! ch'ha Cristos l'han corcadu  
in d'una pappadorza pro brassolu.  
Si vivet in miseria no est solu  
senza domo, famidu e ispozadu  
ca Cristos puru fit senza palazzos  
e istesit fascadu de istrazzos.

5.

A Cristos visitadu, sende infante,  
l'han sos res d'Oriente in mod'ugrattu  
su donu preziosu issos l'han fattu  
d'oro, incensu, e mirra profumante:  
a vint'annos su poveru bracciante  
lu visitan sos res, e in tal'attu  
rezzit in donu sos milites pannos  
zainu e fusile pro tres annos.

6.

Cand'unu artista da' sa' idda sua  
fuit atteras terras pro campare,  
o persighidu li toccat istare  
che bandidu in su buscu cua cua;  
Cristos puru in s'Egittu a tottu fua,  
andesit da Betlem, pro si salvare.  
Su poveru no nd'happat dolu o pena,  
s'andat pro si salvare in terra anzena.

7.

Sende pitticu a pe no iscappadu  
Cristos portadu fit peri sa via,  
in brazzos da Giusepp'e da Maria  
o puru accaddu a s'Ainu imbastadu  
unu pizzinnu poveru trattadu  
non benit certu cun prus cortesia  
ca medas mamas andan pro su soddu  
a fasch'e linna e a pizzinnu accoddu.

8.

Su poverittu appena essit da' niu  
est, in s'umana vida trupegliosa,  
portadu da' sa mama bisonzosa  
a samunare pannos a su riu.  
E a coglire s'ispiga in s'istiu  
pattinde famen, sidi e dogni cosa;  
ca Cristos puru sende criatura  
suffridu hat frittu, famene e calura.

9.

Cand'una poveritta famigliola  
no hat fizu dottore, nè profeta,  
devet istare cuntenta e lieta  
ca mancu Cristos no hat fatt'iscola  
penset chi senz'istudiu no est sola  
ca Cristos puru fit analfabeta.  
Essend' analfabeta su Messia  
no tenzat de nessunu gelosia.

10.

Si solu pro su pane intrat in bttu  
su poveru in s'edade piùs pizzinna,  
penset chi Cristos su mastro 'e linna  
imparadu hat pro haer sa pagnotta,  
e preferidu at che persone dotta  
su tribagliare piùs de sa pinna,  
su poveru che Cristos volonteri,  
imparet puru un' arte o mestieri.

11.

Si tue poverittu in malu istadu  
vives, senza ricchetas e ne dottes,  
invanu est chi ti lagnes o borbottes  
c'a mendicare Cristos est andadu,  
e hat in su desertu digunadu  
baranta dies e baranta nottes;  
e tue si digunas barant'annos,  
vive cuntentu in mesu sos affannos!

12.

A Cristos turmentadu hat su Demoniu  
in su desertu, sende penitente  
turmentadu un'artista ugualmente  
benit da' sos ch'han riccu patrimoni, u,  
e trasportadu pro miseru coniu,  
a gustu insoro a levante a ponente,  
che a Cristos da' monte in campanile  
portadu l'hat su Demoniu vile.

13.

Si benit un'artista riprovadu  
pro calchi lamentosa cunferenzia  
solu pro narrer cun giusta cussenzia  
ch'est dae sos guvernos isfruttadu,  
fit Cristos puru, cand'hat preigadu,  
persighidu cun tanta violenza  
da' sos giudeos, guvernos malignos!  
pro impedire sos suos disgnos.

14.

Cand'un artista pro iniquizia  
imputtadu benzerat innocente,  
causa d'unu amigu unu parente  
ch'esserat rutt'in manos de giustizia;  
a Cristos puru Giudas cun malizia  
l'hat traittu basendelu umilmente  
un artista perdonet su delittu  
s'est innocente che Cristos traittu.

15.

Cando pro giustu e cumpridu reatu  
benzerat unu artista detenutu,  
e trasportadu, pro ordine assolute,  
da' unu logu a s'ateru in tal'attu,  
penset chi da' Erodes'a Pilattu  
Cristos puru ligadu istesit giutu,  
si benit un artista cun violenza  
arrestadu, coraggiu! e passienza!

16.

Cando Cristos est devidu alziare  
carrigu de sa rughe a su Calvariu  
Simone Cireneu, voluntariu,  
sa rughe li cheriat sollevare,  
ma impedidu l'hat de l'azuare  
su partidu ch'a issu fit contrariu,  
nende: Simone, a tie no est permissu;  
lassa sa rughe, chi la ported'issu!!

17.

Gasi mattessi est cando unu riccone  
pensat de sollevare calchi poveru,  
dendeli una domo pro ricoveru  
ch'hat de sa povertade cumpassione,  
sos ateros de mala intenzione  
l'impedini, e li naran cun rimproveru;  
si tue azuas sa zente mischina  
pones in domo tua sa ruina!

18.

Cristos in rughe l'hat sa zente mala  
mort'in sa bella edade giovanile,  
su poveru, sa classe signorile,  
hat pro rughe pesante semprea pala;  
pro la sustennere, in pomp'e in gala,  
morit sutta de cussa rughe vile  
nudu, senza camisa nè calziones  
comente Cristos in mesu 'e ladrones.

19.

Amittinde unu Cristos redentore,  
de comente su clero hat preigadu,  
amittinde, chi s'omine tentadu,  
da su serpente rutt' est in errore  
amittinde unu Deus criadore,  
chi cant' esistit in terra hat formadu,  
e ch'hat potenzia in pagos segurdos  
de fagher e disfagher milli mundos.

20.

Si Deus hat su poderesostranu,  
e subra dogni cosa est imperante,  
podiat su Demoniu dominante  
benner de tottu su genere umanu?  
comente narat su clero romanu  
pro ponnere in paura s'ignorante?  
chi s'omine pro culpa 'e su peccadu  
fit dae su demoniu ligadu.

21.

Si dogni cosa hat fattu Messer Domine  
in su nostru terrestre patrimoni,  
creo chi fattu puru hat su Demoniu  
e chi fatt'hat sa femmina e i s'omine:  
no est giustu autore eo chi nomine  
de su peccadu, a tiziu a simproniu,  
sende Deus mattessi s'autore  
de serpente, peccadu e peccadore.

22.

Nade, si mai unu Deus perfettu  
podiat imputare de reattu  
s'omine a somiglianza sua fattu  
a tortu l'hapat fattu o a derettu  
s'issu l'hat fattu a peccare suggettu,  
e chi s'omine est ruttu in disbarattu  
non podiat no, s'omine mancare,  
coment'issu l'hat fattu d'operare.

23.

E si cust'Ente supremu celeste  
est in su chelu, in terra, in dogni logu,  
est puru in s'abba, in s'aria, in su fogu,  
e tando su Demoniu inue este?  
mund' impostore, giustu est chi proteste  
e narrer, senza brulla e senza giogu,  
s'in dogni logu est Deus in persone  
non tenet logu sa tentazione.

24.

Senza custu podimos bene credere  
chi Deus fit de tottu a conoschenzia,  
cun sa sua Divina onniscienza  
ischiat cantu li diat succedere;  
prim' a s'omine vida 'e li cuncedere  
e si est rutt'este in disubidienza  
s'omine, o siat de peccadu reu  
est voluntade e causa de Deu.

25.

Pro isposare una femina sola  
pover' Adamu, ite disfortunadu!  
dae Deus istesit cundennadu  
issu, e tottu sa discendente prola.  
E Salomone chi hat dadu iscola  
a settighentas feminas culpadu  
no l'hat Deus ne postu in disciplinas  
puru happende treghentas concubinas.

26.

Adamu, sende un omine massaggiu,  
analfabeticu e pagh'istruidu,  
meritat dae tottu cumpattidu  
si nd'hat segadu una Rosa de Magiu,  
ma Salomone, un omine sagiu  
astutu sapiente in tottu ischidu,  
meritat prus d'Adamu cundennadu  
milli bortas, ca milli nd'hat segadu.

27.

Pro una sola, cun tottu s'erenzia,  
fit cundennadu Adamu a sa tortura,  
pro milli Salomone, ite loccura!  
peccadu, ne cundanna, ne sentenza  
non b'hat istadu, ite bella cussenzia!!  
Como conosco ch'est tottu impostura,  
e chi l'hana sos furbos inventadu  
pro usu de cummerciu - su peccadu.

28.

Si fit beru ch'est Deu onnipotente,  
presente in dogni logu bellu o bruttu.  
fit cando s'omine in peccaduest ruttu  
puru inie in cuss'ora presente:  
de ponner in malizia s'innocente  
hat permittid'a su serpente astuttu,  
duncas, happende mancadu o fallidu  
s'omine, est Deus chi l'hat permittidu.

29.

Si Deus tottu hat bidu, e hat permissu  
a s'omine terrenu de peccare,  
it' importat su mundu pro salvare,  
fagher morrer a Cristos Crocifissu?  
si Deu onnipotente solu est issu  
senza Cristos podiat remediare  
dogni fallu mundanu dogni errore  
sende supremu padronu e signore.

30.

Cristos in terra ch' esistidu siat  
coment'omine tottu lu creimos,  
ma da su sou operadu bidmos  
chi podere Divinu non teniat  
amitto chi miraculos faghiat,  
comente ateros oe nd'intendimos,  
chi senza alcunu podere Divinu  
faghene trasformare s'abba in binu:

31.

S' aberu Cristos Divina natura  
haeret tentu, e podere infinitu,  
cand'hat passadu Erodes malaitu  
a fil' ispada dogni criatura  
in Betleme, fuidu cun premura  
pro si salvare non fit in s' Egitto;  
ma prima Erodes d'essere arrivadu  
a Betleme, l'haiat fulminadu.

32.

Chi tenzat Cristos divinu podere  
no l'amitto, ch'est una falsidade,  
ca teninde divina podestade  
e de chelu e terra sende mere,  
fit istad'issu in gradu e in dovere  
de dare a tottu paghe e libertade,  
mentres chi libertade ne cuncordia  
non ch'hat in custu mundu de discordia.

33.

Est tottu vanu chi trintatres annos  
Cristos in terra che siat istadu,  
ca comente issu hat happidu hat lassadu  
su mundu cun discordias e affannos,  
distruidu no hat sos res tirannos  
anzis han creschidu e multipricadu,  
e de continu a gherrare han sighidu  
prima e posca chi Cristos est naschidu.

34.

Si sa paghe tra tottu sos viventes  
su messia in su mundu eretportadu,  
comente narat su clero, e hat nadu,  
in sos tempos passados e presentes,  
dunis haer pro provas evidentes  
chi prus nessuno no iat gherradu,  
ma deviat regnare sempre eterna  
sa paghe, e sa cuncordia fraterna.

35.

Si pro capricciu dogni latitudine  
de su globo terrestre oe girades,  
paghe ne libertade no incontrades  
ma solu gherras e isclavitudine,  
cun odiu, avarizia, ingrattitudine,  
comente, tando, su Messia nades;  
ch'hat postu paghe, in su globo terrestre  
s'in gherra e in discordia ancor'este?

36.

De pustis chi Mosè nd'hat liberadu  
sos isclavos Ebreos da' s'Egitto,  
e de Sinai a su desertu littu  
su populu novellu est arrivadu,  
aspramente Mosè l'hat obligadu  
a credere in d'unu Deus infinitu  
cun sos comandamentos d'osservare  
de non bocchire nessuno, e non furare.

37.

Subra cantu Mosè hat fatt'appellu  
riverente ogn' Ebreu hat iscultadu,  
ma cando s'est Mosè allontanadu  
de sa legge a descrier su modellu,  
su populu de oro unu vitellu  
s'hat fatt' e l'hat che Deus veneradu  
ch'abituados gai, no novizios,  
fin d'adorare sos Deos Egizios.

38.

Cando Mosè haiat congluidu  
de iscrer sa legge, o maraviza!  
falende da' su monte alzat sa chiza  
e i su populu adorende hat bidu  
unu vitellu d'oro costruidu:  
dende lodes a custu prus de miza;  
Mosè, a s'attu indecente infedele  
rimproveràt narende a Israele:

39.

"Proite, o Israele, has trasgredidu  
sa legge d'unu Deu onnipotente?  
pensa cand'in s'Egittu fis dolente  
da Faraone isclavu e opprimidu,  
chi t'hat issu salvadu e custodidu  
e tue ateros Deos riverente  
ses in compensu cha t'hat liberadu,  
però oe pianghes su peccadu.

40.

E in s'attu Mosè hat ordinadu  
a sos ebreos de si separare,  
partegianos de issu, e impugnare  
sas armas prontamente lis hat nadu:  
centra cuddos chi hana idolatradu  
devet su frade su frade isvenare.  
Ubbidit dogni bonu israelittu  
e nd'hat mortu tremizza in su conflittu

41.

S' istrage sambenosa, su misfattu  
chi Mosè hat devidu consumare,  
a tie lasso, lettore, pensare  
si b'haiat mutivu de reattu?  
si a s' Ebreu in s'Egittu l'han fattu  
su vitellu de s'oro venerare  
pro veru Deu, da sende bambinu  
ite culpa teniat su mischinu?..

42.

Sa zente da' pittica incamminada  
in qualunque siat religione,  
no cambiat a manna opinione  
pro chi li dias un archibussada.  
Gasi sa zent' Ebreu amaestrada  
dae pittica, cun devozione,  
fidele adorad'hat su Deu sou  
e no lassat su bezzu, pro su nou.

43.

Como sa culpa'de tale inclemenzia  
a chie de la dare mundu elegges?  
forzis a sos Ebreos, chi eregges  
tue los giamas? no! tene passienza;  
culp'est de Deu ch'hat dadu esistenza  
prim'e sas suas ad'ateras legges,  
mentres s'issu sa legge prima 'e tottu  
l'haeret dadu, custa iat connotu.

44.

Pro sa fide de unu babbu eternu  
de s'ispada servidu si est Mosè,  
tantu pro haer che profeta e rè  
de su populu Ebreu su governu;  
ateretantu su clero modernu,  
pro sa fide de Cristos mundu crè,  
cun rogos e torturas, de persones  
fatt'hat morrere a contu 'e milliones.

45.

Bido chi de occhire est proibidu  
a su populu bassu e ignorante,  
e ch'a su Demagogu a su regnante  
est, solu riservadu e permettidu.  
Ecco sa legge 'e Deus trasgredidu  
ch'hat Mosè cun su Clero segudante;  
però pro issos tottu est dispensadu  
e no esistit legge ne peccadu.

46.

Sa religione prima in Palestina,  
poi in Spagna, in Italia, in Franza,  
istesit, cun s'ispada e cun sa lanza  
fatta credere, non pro opera Divina,  
da cudda zente furba e malandrina  
chi brammat d'haere una maggioranza,  
de populos e terras tottu impare  
pro poder in su mundu dominare

47.

Pro conchistare sa terra promissa  
chent'ortas Giosué dad'hat s'assartu  
tantu sambene umanu b'hat ispartu  
a doppiu de cantu balet issa.  
Carlo Magnu fatt'hat istrage e rissa  
pro riscattare 'e Cristos s'istendartu,  
pro cunverter sos populos paganos  
s'at intintu de sambene sas manos.

48.

Mira puru gherrende unu Sansone  
contra sos miscredentes Filisteos,  
pro sa fide 'e su Deus de sos deos,  
mille gherrieris post'hat a muntone:  
Orlandu furiosu che leone,  
sos saracenos hat postu in anneos  
unu gallicu s'ateru giudeu,  
unu gherra pro Cristu, unu pro Deu.



49.

Shangar, Baraccu, andesini a gherrare  
Davide, cun Saulle, e Gedeone,  
totu pro interessu 'e religione  
e populos e terras conchistare.  
Fioravante, e Rezzieri impare,  
Tancredi cun Rinaldu in unione  
pro propriu interessu fatt'han gherras  
pro sa fide de Cristos e pro terras.

50.

Pro mesu e sos eroes paladinos  
sos pabas conchistadu han sos poderes,  
governadu su mundu hana che meres  
chimbighent'annos e piùs continos  
isparghinde su sambene a trainos,  
bocchende babbos, fizos e muzeres,  
cuddos ch'a modu insoro non crediana,  
a lu narrer in Sardu, los bocchiana.

51.

Si sa Gerusalemme de Torquatu,  
e de sos paladinos sas istorias  
leggides, cantas gherras e penorias  
pro sa fide de Cristos, hana fattu;  
poi. dae Mosè, su longu trattu  
de tantos res sas gherras antigorias,  
chi solu in Cananèa Giosuè  
gherrende mortu b'hat trint'unu rè.

52.

Sas religiones tottu sociedades  
sun comente sos ateros partids  
d'una idea fundad'in terra unidos  
pro conchistare tronu e podestades  
in dogn'epoca e tempus s'osservades  
bind'hat calmos, bind'hat inferocidos  
tott'amantes de bonos aquistos  
chie gherrat pro Deu, chie pro Cristos.

53.

Su veru Cristos est su lavorante  
ch'in dogni tempus su mundu hat redentu,  
dendeli pane, alloggiu e vestimentu  
de sa terra a dogn' essere abitante,  
cuddu ch'est mortu in rughe agonizante,  
naru cun bona fide e sentimentu  
chi sende mortu in sa rughe incravadu  
no podet haer su mundu salvadu.

54.

Sende mort'in sa rughe crocifissu  
cuddu Cristos giamadu redentore,  
non podet de su mundu salvadore  
esser, ca mancu sslvadu s'est issu.  
Salvat su mundu, tribagliende fissu  
s'artista, su massaiu, su pastore,  
pro chi produene in dogn'annu agrariu  
cantu a s'umanidade est necessariu.

55.

Hazis a narrer: si: ma da s'altura  
Cristos mandat sas abbas de arare,  
sole, e nie chi faghet prosperare,  
sos alimentos de s'agricoltura;  
no ischides, sa propia natura,  
de sa terra, hat virtude d'attirare,  
a sé sas nues che potente mole  
abba, randine, nie, bentu e sole.

56.

Dae cando in sa terra so naschidu,  
in forma de un essere vivente,  
a Cristos de sa nues dirigente  
su cursu 'e chimbanta annos no hapo idu,  
s'omine astuttu, malignu, fingidu  
fatt'hat credere chi Cristos mundu e zente  
governat, proet e dat vida e mottu:  
mentres chi da' sa terra benit tottu.

57.

Cando sas nues si tumbana appare  
in sas aeras, in tempos non bonos,  
produin lampos, orribiles sonos  
chi nois tronos solimos giamare,  
su furbu a s'ignorante pro ingannare,  
narat chi Deus los faghet sos troms,  
cando contra de nois s'arrennegat  
fulminat, bocchit e truncat e segat.

58.

Ma tott'est vanu, Deus chi s'airat  
contra su peccadore mundu ingrattu,  
ca pro reparu s'omine s'hat fattu  
sa calamita chi su lampu attirat.  
Cando issu de fulminare mirat,  
s'omine cun s'eletticu apparattu.  
riparat de su lampu sa violenza  
e disarmat a Deus de potenzia.

59.

A Cristos l'han pro bona convenienza  
deificadu sos furbos mitrados,  
pro dare esempru a sos diseredados  
chi Cristos non teniat possidenza.  
Si, da sa padronale prepotenzia  
custos sunu in su mundu calpestados  
mustrare non si devene insolentes  
ma, che Cristos umiles, pazientes.

60.

D' haer Cristos salvadu mundu e zente  
non cretedas ca fit a paragone,  
comente una nobile persone  
d'unu grande marchesi possidente,  
chi cret cun sa ricchessa solamente,  
de salvare una intera nazione:  
però si non tribagliat e produet  
sa ricchessa a niente no influet.

61.

Gasi matessi Cristos Nazarenu  
fit che marchesi improduttiva landa;  
su tempus ch'issu hat fattu propaganda,  
campadu s'est da su tribagliu anzenu,  
lu narat s'Evangeliu in pienu  
chi Cristos est andadu a sa dimanda,  
duncas resultat su mundu, e a Cristos  
chi sempre han campadu sos artistas.

62.

Sos artigianos, biddas e cittades  
hana custruttu, e istradas e pontes,  
non sunu Cristos, marchesis nè contes  
ch'han tribagliadu in tottu sas edades,  
lughes de gas e d'elettricitades,  
acquedottos, potabiles fontes  
han, pro sos artigianos, mottu e vida  
dogni bidde e cittade costruida.

63.

Cuncertos musicales mandolinos,  
cinemas, e teatros e cantores,  
ristorantes, cunfettos e licores,  
passizadas e publicos giardinis,  
sigarros, sigaretas e luminos,  
festas, fieras, caddos curridores,  
tantu sia de mente che de manos  
opera totu est de sos artigianos.

64.

Carrozzas, automobiles, tramvias,  
bastimentos, piroscafos navales,  
telegrafos, cun postas e giornales,  
macchinismos, veloces ferrovias,  
incisiones, e fotografias,  
casteddos, monumentos eternals,  
cantu in su mundu d'arte esistit tottu  
fatt'hat su veru Cristos non connotu.

65.

Su falsu Cristos, cun su benistante,  
mai no hana su mundu salvadu,  
ca semperunu ed'ateru campadu  
est dae palas de su lavorante,  
a bezzu, a giovaneddu e sende infante,  
l'hat s'artista bestidu et allattadu,  
e cand'est mortu, l'hat giutt'in carrossa  
oppuru accoddu finas a sa fossa.

66.

S'omine furbu s'ignorante trampat  
nende: chi senza riccu e senza Cristu,  
in su mundu no campat un artistu  
mentre senza s'artistu issu no campat:  
tottu sa valsa fide ch'issu lampat.  
Cando bene l'esaminat s'abistu,  
bidet craru, chi, senza s'operariu  
no campat s'oziosu proprietariu.

67.

Si logicu su fattu e giustu fiat,  
in s'epoca antigoria passada;  
morta sa classe artista fit istada  
ca Cristos tando e riccos non ch'haiat.  
Mentres ch'a chentu ortas istaiat  
meda menzus, senz'esser'isfruttada  
dae cando esistidu est riccu e Deus  
vivet, de tando chentu ortas peus.

68.

Suffrit su lavorant'agricoltore  
de s'jerru sa rigida frittura,  
e in s'istiu, a sa mietittura,  
su soffocante arsibile calore,  
e i su nobile illustre signore  
in campagnatas e villeggiatura  
a s'incunza regollet dogni fruttu  
lassende s'artigianu a runcu assuttu.

69.

S'Abe, cantu fattigat e peleat  
pro fagher de su mele conquista,  
a su tempus chi fatt'hat sa provvista  
andat su mere e su mele nde leat;  
a tribagliare tottu s'annu impreat  
e nde tenet sa parte più trista  
no podet de su sou issa disporrer  
che su tantu de viver pronu morrer.

70.

S'artista puru, in s'umana laguna,  
tribagliat pro mantener su mandrone,  
de su fruttu de sa produzione  
no ndeli dan de chentu partes una  
in mesu sa ricchessa no hat fortuna  
pro chi bi ndela leat su riccone,  
si nde tenet su pane a si nutrire  
li mancat su calzare e su bestire.

71.

Ma si de s'Abe s'esempru sigheret  
su mundu menzus caminare tiat,  
su mandrone chi non tribagliaiat  
ugualmente a s'Abe lu occheret,  
creo s'isfruttamentu chi cesseret  
ca dognunu sa morte la timiat,  
e si cheriat pane a mandigare  
li beniat forzosu a tribagliare.

72.

S'Abe, sa fratellanza, sa giustizia:  
mustrat prus vera e sa vera unione  
dat esempru a s'umana nazione  
chi nemos devet fagher sa preizia,  
devet produer dognunu a dovizia  
pro mantener sa propia persone,  
e fina a cando non faghimos gai  
paghe tra nois non ch'adesser mai!...

73.

S'omine riccu, in d'una paraula,  
non produet, nè faghet benefiziu,  
ca lu tenet de naschida su viziù  
de fagher su mandrone, e no est faula:  
issu est avezzu a mandigare in taula  
e fagher de vivandas isperdiziu;  
da' sos artista, cun delicadesa,  
cheret esser servidu fina a mesa.

74.

Su tribagliu de s'altu Signoriu  
est de leare in manu sa furchetta,  
de si mantener a pische e a petta  
tottu sa vida, cantu durat biu,  
passizare in jerru e in istiu  
cun sa sua madama a sa brazzetta,  
andare in carrozza, a caddu, a pè  
dae su biliardu a su caffè.

75.

Viagget su riccone in ferrovia  
oppuru in nave, in s'oceanu infidu,  
da' sos Artistas semprer est servidu  
e guidadu fina a s'osteria,  
cand'isbarcat, cun grande cortesia,  
dae sos artigianos est rezzidu;  
li preparan alloggiu, mesa e lettu,  
cun tanta riverenzia e rispettu.

76.

S'incasu donat manciaso istrinas,  
o limosinat calchi mendicante,  
pro si mustrare omine galante  
regalat pagos soddos o sisinas;  
est dinari furadu in sas fainas  
da' su tribagliu de su lavorante,  
faghet a bier ch'est benefattore,  
ma non dat nudda de sou sudore.

77.

Comente faghet su riccu birbante  
pro fagher una fura piùs splendida?  
ponet de comestibile una bendida  
e bendet a libretto, e a contante;  
s'est esercente, da' su lavorante,  
tenet tottu s'intrada e i sa rendida,  
faghet a cumprimentu ogni faina  
e pagat tottu in ispesa 'e cantina.

78.

In sa buttega sua endet de tottu,  
pane, pasta, farina mesturada,  
ozu comunu, lardu e aringada,  
casu de craba, cunserva e regottu  
legumene isceltadu 'e malu cottu  
chi coghet prima de issu sa pinzada,  
oltre chi mala merce bendet issu  
l'imbrogliat in su pesu cu Cummissu.

79.

Gai pagat sa nobile persona  
cudda limosinante zoronada,  
merce de rifiutu istantissada  
bendet a caru preziu che bona.  
Certa zente usuraria, ladrona  
cheriat da sa naschida impiccada,  
ca su tribagliu 'e su zoronaderi  
pagat in mala merce e in papperi.

80.

Oltre su lavorante 'e l'isfruttare  
lu ponet in severa disciplina,  
dendeli pane siat, o farina  
a misura 'e no morrer' ne campare:  
si benit unu a s'ammalaidare  
tando li serrat su bonu 'e cantina,  
e si no morit de febbre o de frittù  
morit disisperadu 'e s'appetittu!!

81.

Su riccu nàt chi pagat sas impostas  
de cantu tenet in possessione;  
chi pagat issu già tenet rejone,  
ma bessit tottu dae palas nostas;  
si milli scudos si ogat da' costas  
nde guadanat unu milione,  
chi pagat sa rejone bi la damos, .  
ma semus nois chi tottu pagamos.

82.

Sos titulos chi dat a su bracciante,  
cudda nobile classe signorile,  
est sempre istadu de rusticu e vile,  
de mandrone, de tontu, e d'ignorante;  
de imbroglione, de ladru, e birbante,  
de vagabundu, cretinu, imbecile,  
imbregolu, ispreccone, insolente,  
e infine lu trattat de molente.

83.

Disprezziare intendimos ispissu  
sa nobile Signora, e su Signore,  
su poveru massaju, su pastore  
ca bestidu e civile no est che issu,  
ca no pensat s'illustre mincidissu,  
chi custos chi hat issu in disonore,  
e cittat, cun disprezzu, a paragone,  
chi li dana su pane, e i s'anzone!...

84.

Cessa, riccone, d'esser insolente,  
e sias cun su poveru amorusu,  
tantu si faghes de presuntuosu  
menzus non ses de sa povera zente;  
vantadi solu, chi ses possidente,  
pro ch'ateru no has de preziosu;  
ma no nerzas chi ses de menzus ramu  
ca semus tottu fizo de Adamu.

85.

Termine a sas bideas ostinadas  
ti cumbenit, o nobile, chi ponzas,  
ch'a piùs de su dannu sun bigonzas  
a persones che a tie educadas:  
pensa chi tue mandigas debadas  
in cumpagnia de padres e monzas,  
e chi su lavorante notte e die  
est tribagliende pro campare a tie.

86.

Si tue haias bonu sentimentu  
non dias s'artigianu disprezzare,  
anzis sos pes li devias basare  
dogni die, dogn'ora, ogni momentu,  
ca pane a tie, alloggiu e bestimentu  
tottu sa vida t'hat solidu dare;  
si nd'has da issu sas visceras sazzias,  
no torres pro cumpensu malas grazias.

87.

Pensa chi tue ses piaga e peste  
pro chi lives fattende sa preizia;  
tue ses su Cainu ch'ingiustizia  
usadu has contra Abele in su terrestre;  
non ti mustres superbu ne areste,  
istringhe cun su poveru amicizia,  
ca ses da' issu bestidu e campadu  
tottu vida, che porcu peisegadu.

88.

Torra, riccone, a s'antiga amistade  
comente minoreddos cando fimis,  
chi poveros e riccos giogaimis  
in sas carrelas in sozziedade,  
si fis de nois tando amigu e frade,  
sende mannos ancora esser devimis,  
unidos in comune fratellanza,  
comente amos connotu dae s'infanzia.

89.

Convintu ses o no, capitalistu?  
ti paret giustu cantu t'hapo nadu?  
a narrer si, t'agattas obbrigadu  
ca bestidu e campadu t'hat s'artistu.  
Sempre s'artistu non tue ne Cristu,  
in dogni tempus su mundu hat salvadu,  
e difesu t'hat vida, domo e terras  
morind'issu in sos campos de sas gherras.

90.

E tue, zente, patria isolana,  
senza istruzione e senza iscola,  
no t'istes prus che ainu de mola  
chi rezzit colpos cantu ndeli dana,  
ma legge sa Cummedia Mundana  
tue e sa tua discendente prola;  
legge, ca cun su tempus incortrare  
podes sa vera via 'e camminare.

91.

Sa vera Religione d'imitare  
est, o bracciante, o possidente, o re,  
su male chi non cherzo eo pro me  
non devo mancu a tie causare,  
cantu bene pro me hap'a bramare  
devo bramare e cherrere pro te,  
fraternamente in paghe totugantos  
senza reccurrer a Deos ne Santos.